

國朝常州駢體文錄

國朝常州駢體文錄卷第十五目

崇百藥齋文九首

陽湖陸繼輅祁生

攝山采藥賦

牽牛弩賦

絡緯賦

周南書院寓室銘

周保緒書贊

并敘

兩晉名賢贊

并敘

邳城縣續志敘

邵蘭風哀辭

從孫申右哀辭

雙白燕堂文六首

陽湖陸耀道劭文

齊北瀛太守鯢紀

恩四圖總敘

馬一五  
石倉山館印譜敘代

陝甘總督那公夫人誄

陝甘總督章佳公夫人靈表

祭劉芙初編脩文

祭黃恕堂先生文

國朝常州駢體文錄卷第十五目

國朝常州駢體文錄卷第十五

崇百藥齋文

陽湖陸繼輅祁生

攝山采藥賦

吾師莊達甫徵君爲攝山采藥圖以示繼輅繼輅久從徵君遊爲能知徵君之深者徵君抱經世才嗇於遇不得施寄意林泉閒行歌采芝同夫作者蓋蜀莊沈冥固君子之所尚也迺爲之賦曰

同青氣兮遠風散芳馨兮奚所同廓含秋而一顧羌眇然兮山中山則仰幹斗維頻絡江渚前蟠句曲後躡龍阜雲霞蔽虧峯巒楷柱墮石齒齒兮荒厓嶙嶙飛水閼谷兮恍若有聞深林寂以窈窕上蟄伏之所羣仙田兮靈畹枝香兮葉短逮緇艸之可擷及朱華之未晚爾乃神藥奇艸周

馬一五  
羅駢生黃良白昌赤節朱巖金鹽玉豉珠英石精桐君之  
所未錄農帝之所不名裳繻絰於深莽步遲回於窳賔芳  
菲菲其未迷磴盤盤而難上孰好修兮在予極勞心兮慙  
惆愀惘兮眇縣心眩回兮屢遷擣重滯於五難接輕鸞於  
九僊指若木以寫意拾瑤艸而悠然亮覽察其可得兮願  
從皋蘭而扈荃

牽牛鶚賦

猗閒庭之小艸有籬畔之牽牛託嘉名於河鼓舒柔條於  
勁秋感匏瓜之久繫念良會之阻修奚天漢之可涉步階  
墀而夷猶於時玉露畱華冰輪返駕翠黛連娟綠鬢低亞  
乍現景於優曇遽委形於瓜柳詎朝暉之不接兮隱幽姿  
之速化刻移陰於曲檻兮悟榮枯之代謝彼羣卉之自炫  
兮孰芳華之可貴儻塵夢之易覺兮竚星辰於今夜亂日

飄風兮吹衣望靈鳥兮來遲願引蔓兮湘竹紛別淚兮帝  
妃諒離居兮自古匪獨處兮在茲

絡緯賦

伊秋人之無寐兮紛百感之初心有蕭蕭之絡緯兮荅哀  
響於孤吟翳片葉而爲安兮奚喧喧而不已豈宵杼之因  
顧兮迫寒侵於在已維春鳥之催耕兮亦中夜之啁啾諒  
棲啄之易遂兮抱盈歎之隱憂羌物小而志大兮懼多言  
之見尤彼鷹鷂之歛翼兮方煦嫗而爲德汝旣不與蠅蝶  
以爲羣兮宜含貞而守默毋強聒以終宵兮愴僑居之淒  
寂

周南書院寓室銘

亭亭瑶林非鵲曷棲英英香艸寸根不移何以卻疾飲芳  
食非何以延年沐玄浴微懷哉斯室旣安且夷敬業以勤

樂羣而嬉佛戀三宿莊適一枝永朝永夕云胡不思惟屋  
有烏惟木有黃用告後來眎此銘辭

周保緒書贊

并敘

黃生承谷好臧保緒書暇日出以視余詫爲絕特亦嘉黃  
生之能自得師不可無以輔其志乃作贊曰

翳儒生之一藝紛異說之百端誠首涂之是謹諒筆正之  
有源昔冉氏之多能孔聖亦爲之永歎旣琴乖而劍棄聊  
寄興於柔翰操縱適度眎睽四周雄虹雌蜺左旋右抽鏘  
鳴珂於逸足馴野鶻於勁秋遠而望之若蓮苞乍放迎朝  
暉而振采近而睒之若蘭心初展滋曉露而未收吾聞信  
此者糾彼徇人者喪我惟譽慕而毀喜斯古卽而今離矧  
斯邑之合體將姑舍乎繇義奚許史之屏障足惑志而有  
他願卽小以箴大慰歧路之滂沱

兩晉名賢贊 并敘

楊生方訓讀晉書卒業問於余曰王太保列名臣之首傳  
荀侍中標忠義之始篇二公者豈惟典午之彥其殆百世  
之師乎余未有以應也他日又以爲言迺仿袁彥伯三國  
名臣之例而小變其體裁爲贊十有六章非敢進退古人  
所紆向往之懷比於益各之義其辭曰

雪涕游山角巾歸里倚嗟太傅去人遠矣戎術誤國胡廣  
之徒惟君見微抑其朝笏鄰敵引觴遺碑墮淚尙詐之朝  
見此豈弟漢文短喪虧孝傷化惜哉傳元矣阻鴻議

羊祜

傑士晚達廉讓易虧我懷司徒不忘潤阿旣乖夙心克終  
台輔故宅風摧縣絲塵數伊古有訓以人事君避嫌遠謫  
豈節之純倚嗟司徒后事在懷屈抑之士微君安歸



山濤

城陽將種勲在漢廷錚錚僕射肖其家聲重華受禪乃方  
桓靈寧非眾辱帝歡不驚一言之容臣主俱榮我懷汲黯  
彌歎鄒生平津在旁臣臯當刑敬告有位勗哉交成

劉毅

志烈才雋終摧鳳羽嗟哉步兵保身良苦壞牆治郡乘驢  
赴官飾行爲市匪君所安酒云忘憂乃更悲涕惟拒勢昏  
藉茲醇醴心孤跡晦大昌其詩遺音誰嗣悠悠我思

阮籍

高士好游弱冠不學聖善承訓一言而覺修名旣立外慕  
悉捐孰云處賤非居之安孰云貞疾非壽之原徒曰委心  
其然豈然道因文見直以靜成顧謝莊老是爲幽貞

皇甫謐

子上肆虐戮直護前義非率土配共戴天哀哉孝子坐不  
西嚮庭柯謝榮驚雷收響眷戀邱墓寇來不返福禍變常  
天高難問於庠孝子遭難固惻父以彊死安用考終

王哀

羈宦多感鄉思轉深沉逢搖落秋風在林菰菜萁羹復何  
足道客緒蕭條遂關懷抱未知吳中孰君故人應有清酒  
爲滌洛塵賤老相尋榮壯俱去達哉季鷹善處遲茸

張翰

烈烈豫州擊楫渡江既定譙城遂破季龍渾河以南盡爲  
晉土鏃刃之餘克善懷撫枯骨銜恩荒田闢莽幸哉遺黎  
遇此慈父天不右國妖星乍明云亡之悲豈惟武鄉

祖述

江左名世溫生堂堂玩敦於掌鳳譏不行跡其才智近平

縱橫豈知求仁亦貴有術吾舌猶存非卿可拔功名之際  
悔吝所生苟乏學術鮮能持盈辭政歸藩君子之成

溫嶠

安西守節強藩內足侃侃爭言彌乖逆志涉險不驚忠信  
足恃鳳德懷鵠豈徒天祐鎮軍無機渾然天民風動帳間  
乃見嘉賓省書輟哭遺疏舉親此父此子厥義惟均

郗鑒

巖巖忠貞嫉惡若讐子臣兩議名教是憂奏推澄鯁坊民  
以禮彼哉導亮何足語此敦既作賊晦亦凶終我識王謝  
未稱名宗懿歟忠貞妻義子孝是爲高門全家蹈道

卞壺

玄言羣矜實學將廢觥觥弘農許鄭是繼宗經述聖何擇  
之嚴擁篲企躅何言之謙策員骨智道無悖吉古皆有死

願盡今日悲風蕭蕭城南之岡應有雲螭迎君帝旁

郭璞

名卿拒諫勝情妨要寇至登山事同休笑右軍高曠實異  
老莊三書論事炳何煌煌貞觀好文傾心書翰遺大稱小  
疑乖素願臨流感逝望遠傷離我游蘭亭愴焉悲歌

王羲之

文靖柄政恢廓自喜信天之極誕受嘉祉不憂不惑既安  
既夷自抱仙骨學步則非抑間在管相策羣才簿書期會  
吏胥所能日勤與慎非道之該由斯以談曩乎遠哉

謝安

沒世無稱君子所懼鍾鼎既乖爰有造箸奈何盛年好及  
博奕隱雖無文志言可采題戶書紳佩茲良誨寒燠照夜  
如日之升我贊晉賢附以平陵媚學之士庶幾可興

馬一三  
王隱

我聞先聖論定逸民孤竹而降寥寥數人猗與靖節非君  
不仕徒曰名孫淺之言志文辭之美婦孺所欽徒曰閒適  
未爲知音嗚呼靖節晉邪宋邪不知有漢言之慟邪

陶潛

郟城縣續志敘

昔在元狩實載東封降及天禧天書是崇於惟

高宗德隆三大侯不邁哉孕虞育夏 帝曰省方民瘼是

詢星雲麟鳳元符勿陳 天章煥炳 湛恩龐洪萬物慕

思與天無終志 巡幸弟一

孔式負版姬拜民數衛民庶哉佚居斯懼郟今大縣劇于  
附庸生齒旣繇詎無哀鴻催科撫字何道之從 皇清御  
宇久安長治減稅蠲租億萬萬計願良有司慎體 聖意

志田賦第二

煌煌吉禮疏數有經人和年豐奉盛斯馨我 皇稽古特  
崇司命光輝粵新 文治彌盛旁參道臧兼及僊真凡茲  
禋祀皆以爲民太乙漢祠玄皇唐祖遐哉 聖清度越萬  
古志秩祀第三

郊濱東海古風可懷蘆簾竹閣是名官齋毋曰傳舍爾瞻  
所集昔賢大夫一日必誓講院之設矧以育材不植桃李  
乃生莓落重門勿扃疏櫺自啟或有幽人來置圖史志建  
置第四

郡縣肇設粵資循良東海名守淮陽平陽淮陽卧治黃老  
是遵苟不善學不如克勤平陽尙猛手擊大猾良苗遂生  
藜棘斯拔水懦火烈諒哉前聞敬告有位勉爲惠人志職  
官第五

漢舉孝秀周興賢能豈惟名哉實行是徵苟乏經術曷不負弩苟志溫飽曷不爲賈鄴瀕東海文瀾洋洋遭逢清時有善必章校文東觀侍讌西清敬畜光采以副盛名志選舉第六

孔言十室必有忠信鄰戶九萬豈乏傑雋志以節顯績以宦成到今之譽志士所爭亦有躬耕不樂仕進幽人貞吉絕凶悔吝如波載濫如春方韶琴靜壙和使人意消志人物第七

齊魯之士以氣節名詩三百篇乃遺陶嬰嗚呼聖人慮之孰矣榮名有歸反是辱矣經經宋儒刻論斯起剪髮髻面甚者橫死猗嗟女士丈夫所難今此不錄寥寥人寰志列女第八

儒林道學分自宋代空言既繁古訓斯晦東海經義日始

后蒼肅也嗣興炳何煌煌前志往昔兼列顏籀邨自多賢  
借才轉謬 聖清建極稽古右文勉爲實學以紹前聞志  
著述弟九

惟古於辭殊塗同歸王盧淹忽駢儷乃衰東海人文齊梁  
尤盛前鮑後徐珠輝璧映夕秀待啟朝華易闢我來弔古  
招悵雲山沂河水清流河水深乘月獨往如聞孤吟志文  
章弟十

邵蘭風哀辭

道光元年五月五日昭文邵蘭風卒春秋四十有九於虜  
哀哉當乾隆嘉慶間常輒昭文文學尤盛孫原湘子瀟蔭  
因培伯生竝倜儻自意意不可一世蘭風年未冠操筆與  
角兩君心服遂齊名其後子瀟成進士引疾去館至今未  
眞除伯生由他塗爲縣令旋以得過失職而蘭風終於諸



生三君子者其豐於才而嗇於遇一也然蘭風非徒負才尤勇於爲義嘗應順天試被落畱居京師族子某聘宛平某氏愆期久貧不能昏婦家以爲言蘭風盡鬻其衣裘車馬僦屋宣武門之南馳書召族子至迎娶如禮因畱其夫婦婢媼給衣食甚具久之不忍遣去迨族子生子數歲蘭風亦再試不售困甚乃使附漕艘先歸余交蘭風二十四年時時與蘭風別最後別於宣南寓舍不相見者又四年今春蘭風書抵合肥云苦左臂麻木余報書以止酒爲勸嗟乎造物者旣嗇其遇矣豈復促其年邪而不虞天之不可測一至於此也往余刪定舊詩凡與蘭風往復之作適皆不錄蘭風展閱竟意不懌粹語余曰吾名乃不見於君文余笑曰繼自今有作輒存之未艾也然四年中卒未有作今乃爲辭以哀蘭風蘭風諱廣銓字甄士弟四邵氏世

以文學通顯有名齊壽者學者稱叔山先生從祖也祖齊  
然父垂惠母馬夫人妻錢氏子曰淵嫩辭曰

嗚呼今日何日兮痛左徒之自湛越千餘年而悲未已兮  
乃復喪我蘭風信乎爲不祥之日兮雖生百孟嘗而何足  
以解萬古之傷心嗚呼哀哉子與我俱弱冠兮初相見於  
金陵忽秋氣之蕭屑兮忽流霞之滿庭瑤簫兮玉簫墮天  
琴兮瑤席招麻姑兮奉觴閒雙成兮行炙染山翠於高鬟  
兮繫圓靈於遙夕逮都門之重姬兮察豪氣之漸除方迎  
夏之多感兮飲天橋之酒壚孰先醉而悲來兮撫青琴而  
懷舊有櫻桃與芍藥兮進石華之廣褰日向曉而戒塗兮  
乍倥偬而容與照塵顏於桑乾兮見高寒之玉宇羌隱隱  
而闐闐兮紛雲駟之來下子偕返於碧城兮夜漫漫而獨  
語悟爲歡之無幾兮竝離憂之難再茲人天之永訣兮願

緘愁而坐對嗚呼哀哉雖子身之久困兮文采爛其被體  
天既玉汝於成兮乃今而逸子以死不可謂非天之厚子  
兮子毋悲於朝露當求屈子之魂而與之友兮發餘芬於  
蘅杜諒修短其同盡兮森湘江兮余將渡

從孫申右哀辭

申右名嘉應先考恭城知縣陸府君曾孫先兄桐廬知縣  
諱繼輿孫從子國子監生耀遷子其少也嘗從先友莊君  
曾儀受經略皆上口以家貧故早出傭書學未竟然性好  
篆刻見漢魏私印輒仿爲之往往亂真人以石來未嘗以  
事辭道光三年十月廿九日卒於婦李氏年四十有八子  
佑駢先卒以兄子佑騫後十一月赴至合肥哭已爲辭以  
哀之辭曰

上章之歲斗柄插酉汝來省吾一室斗方兩榻磬折牽舟

岸居擁衾夜談閒以悲歎時復笑噓我初去鄉形神刺促  
如囚在拘自汝之來魚游圉圉稍自展舒官舍偏仄舉動  
振觸坐炭負涂自汝之來人景鏗光乍歸故廬畱逾十旬  
母疾遄返握手唏噓汝指庭樹行當復來期挑始筭何圖  
不弔游丁大故旣哀旣孤甫及蚤髻再膺酷罰殃逮童烏  
頰仰慘痛人離鬼狎二豎睚盱沈痾經年泉臺在望跛不  
得趨恆榦委棄園扉大開匪戚而愉於庠哀哉死孝死慈  
義何所附而殞而軀譬艸一莖曷培以茁孰刈使枯高高  
者天福禍之宰詎殺不辜猥以骨肉不勝大願乞觀爰書  
於庠哀哉

雙白燕堂文

陽湖陸耀遒文

齊北瀛太守鯤紀 恩四圖總敘

夫華平之木應晞陽而猗芬歸昌之禽望縵采而翮羽況  
復六磨服路之代五鳳調元之年天鏡激文地槃翕載通  
正和其嘉會介類推其永錫優賢之風歷試闔門之瑞允  
升是以周宗熙業山甫著將明之才魯篇熾宣庶士多燕  
喜之譽嘉慶辛酉北瀛先生以進士入翰林於時黃離繼  
明滄島重潤陽兆之禮既洽寶璫之書待纂先生珥彤史  
成紬匱仙室千七百水通波沈綠之池二十八宿窺景流  
離之篋中經校簿紺煙襲衣石渠坐論華月升席蓮檠徹  
照卽對熙連之城金積旁間更入閩風之苑 國家東撫  
開梧西綏燾靡南諧孫樸北燮禹璽雷鑿雲空絃周縝布  
昭蘇蟻蛭之穴頡頏鱗介之渚顧彼中山邈當前戍斯地  
也魚門匹溢鯨路欒槍鼉鼉浮嶼則陽轡逸翔落際奔閭  
則賁芒沸霄三重壑柵近絡揭天七九仰規斜縣赤道先

生其蕩光塗皇華被隰祖楫擊汰遠架鼉鼉之梁澹劍橫  
腰自得蛟龍之氣烏冠螺飾肅拜天人樹衣熊甲桶瞻漢  
節懽斯舊姓桑木獸而申驅波羅邃居闢雕禽而拊待蒙  
蒙焉喁喁焉懽喻乎德意警慄於威棱者矣若乃長卿使  
蜀嚴助歸吳發叩竿之符馳甌越之傳而成都父老僅有  
王孫會稽故社惟傳友壻先生則具慶習祥重蔭剪楸華  
黍侑潔恒餽佐馨麟章絢其舞衣霄露斟其康爵星旄燭  
夜大明孫子之垣海殲移風化成孝養之國畫繡之樂今  
古蔑焉迨乎尹表三河割守百邑飭東都之禮復司隸之  
章社鸞儀樹時見交枝歸雁銜蘆多迎露軾爾乃雞渾上  
揆烏帑鶉火之維鰲紀下清碧洛黃嵩之館鳳飛地闕龍  
度天門銀蟾界壁俛鏡河仙石象高龕下臨震旦元夷秉  
鑿發玉簡於姒封榮光負甲肅靈壇於姬璧皋稽擁旟屏

翳承蓋湛甘醴於葦杖滲酸雨於輕輪是又陝左之笈畱  
其蔽芾鮑氏之驄數其工步者也榮問懋昭祥祉蔚備爰  
志圖畫都爲四卷曰玉局校書曰球陽持節曰蘭陔洗腆  
曰龍門秋禱盤礴之事旣章風詠之才滋盛異日南宮肆  
閒麟閣躋列趙州萬戶繡平原之絲荒憬九驛謁承宮之  
貌呂溫授簡待箸陵煙之銘王褒宣德先諧中和之頌

石倉山館印譜敘

代蕙公子巴哈布

懿昔青泥蒼水代有遺文赤玉丹章理參祕笈八會三元  
之錄肇自皇初五章九疊之傳稽諸史牘周治繆篆秦廢  
古文刻符仿乎六書摹印通乎八體漢志藝文隋志經籍  
篆刻之作由來尙矣李冰之論印法也神明於規矩方圓  
徐宮之箸印史也錯綜於陰陽奇偶龍蟠馬負聿開千古  
之圖書鳥跡蟲涎實萃百家之金石若夫官印私印書爵

書名界朱白以成章出青藍而證古大書深刻園亭軒閣  
之題密字排窠駢賦歌詞之句鸞乳災同於簡畢棗心功  
讓乎刀錐因煮石以呈能遂濫觴而踵事苟適於用無美  
勿章肆屈曲於牢籠之中得微妙於筆墨之外是則廣堯  
章之諧彌見其多補松雲之編旁搜莫盡者歟僕也弄璋  
夙志提印先徵載觚榼而問奇衍巾箱而集古碧綾黃素  
背縫都鈐玉躐金題首標親押浣花紙上歷歷留筒章艸  
篇中纍纍襲策聚於所好兼收奚別乎古今愛則斯傳其  
賞何分乎雅俗雖蟲技小誠非壯夫之之所爲吐鳳文成  
如見古人之可作云爾

陝甘總督那公夫人誄

嘉慶十有六年九月十五日陝甘總督那公繼室宗室夫  
人卒嗚呼哀哉玉柱陵隤金波逝陰娥筠霜擢苕瑄灰青



胡云不榮彤華飛焯胡云不傷寒曜戢暑椒焚猶郁膏晷  
猶薰無百歲之樹檟有千秋之貞珉託旂旒以累德述鍾  
萬以圖芬乃爲誄曰

猗歟夫人坤輿粹鍾旣稱女師亦曰禮宗瑤澠儼光璇樞  
鬱彩植幹華銑分支靈海英英寶醴采采琅玕月竈祕儀  
星潢潤源失恃鰥辰庀家笄歲內紀攝操羣季檢誨愔愔  
德音申申整暇授業扶風肅規林下摶音鶴集始旦雁雝  
濱蘋潦藻窈心窈容契闕寢門貞吉中饋言默已諭志承  
克慰晨禽喈喈已潔脩股嘒鳥噉噉尙勤箴管倉獨諸性  
適誠調辛衣獨安吉說禮娛身脫釧酬書徹環佐讀媼嫻  
盈籤謨觴積軸光光夫子儀羽雲達出持禁節入侍皇闈  
含暉表冲撝謙以約儉守疏布政修帷薄求賢方雅致聘  
高邱深仁螽羽均一鳴鳩二十八年作嬪君子馮翼安世

穆宣陰禮君子於役西窮天山靈關春阻飛沙晝殷君子  
有行東翼滄澁捷屬宣房鏡激太史冥冥經緯安安鎮靜  
綜理閭幙代奉溫清金城贊政紫微促裝魚軒遠陟翟茀  
邁行華屋財臨高春遽算脫簪不留閭川難駐煮蒿歸葬  
重翬首塗猶垂總帳虛竚靈壺亦有茗華嚴妝婉東亦有  
姬姜委佗象服當時則榮沒世曷稱惟此上德千載其馨  
鬻封四結蚘松萬年往日莫追存名永傳嗚呼哀哉

陝甘總督章佳公夫人靈表

嘉慶十有六年九月庚寅兵部尚書陝甘總督章佳公繼  
室宗室夫人卒於署春秋四十有七其明年反葬京師阜  
稽振飭甘華秋穰常儀戢霸娥英夜寒昆侖玉橫沈九井  
而摛耀鍾山鑪冶歷三變而曬光不有壽珉曷彰偉策夫  
人係出宗室故鎮守陝西西安將軍恆瑞之女也生應靈

和誕啟光度陽谷日曠秀華蓮之支神潢星殷疏析木之  
潤爰自羈髻垂芬珩璜範圖曲儀動式女憲幼喪母將軍  
奉使西域夫人扶翼內政檢誨羣季如成人焉閨檐總操  
經緯冥布江左謝過肅林下之規扶風賈逵受壁中之訓  
淑問以簪婚音允臧年十九繼室於公公故大學士文成  
公孫少孤奉太夫人教爲今名臣西京丞相世躋三能東  
海祕書光重七葉固知焦明歸昌諧長離而挾耀雲和振  
越叶咸池而効響是以儷瑣赤野合珏藍畦考鐘來離饋  
案齋穆奉箴言於師氏虔展覲於威姑怡旨栗榛飭佩箴  
管白華絳趺侑廣微之馨潔縹被疏帳侍公奕之溫清泊  
公影纓華省擁節封圻懍上將之河鼓總宣防於靈瀆夫  
人笄珈應圖簪衣節步履貴能降處膏不腴宗嫺式禮於  
鍾珮須臾捐思於沱汜故得祥分燕姑佳簪泉邸琅玕擢

其駢柯蓀蕙接其鄂跗公當再奉

嚴旨出塞夫人上堂起居中饋契闊豐悴各揣其宜稱陶  
戚不介平容儀慰倚閭之懃憂釋閭門之恒懼持情鎮物  
有獨難焉公仍奉命總督陝甘太夫人就養夫人奉烝嘗  
於家衛躬纁繭於皇闈倦少君養姑之誠撫德曜如賓之  
敬踰瞻雞塞遄命魚軒以今歲八月至於蘭州隴坻塗迥  
熇涼氣侵丹液之漉未間穠華之輝不振嗚呼惜哉惟夫  
人毓粹清華含章貞吉詩禮說性綈練宜躬徹瑱購嫺嫻  
之文傾簪市媼嫺之笈窈窕德象綢繆倫紀儉而有度廉  
而好施紉國僑之紵衣被其僚友班鄭表之祿秩逮平周  
親九膽勵學無分於適支含飴佐餽必均於童穉若其秉  
易直於言容通神明於孝弟不惑衰誕不宗老釋故方沈  
痾孔亟卻請於讓衰彌留之言惟勤於侍奉是乃愛敬天

情純和地德女師彤管庸有閒然今畫翼首涂房腸行掩  
哀子容安等感尸鳩之平一傷樹護而憂痍靡所底念迺  
請於公撰錄內行咨之羣儒燿通辱公之齒盼誦夫人之  
德履不敢以讓遂著靈表而申辭曰

曜靈植幹結璘儷文異維延粹兌野凝芬賁儀魯篇式範  
周策陰禮順成房樂馮翼允迪惠問克嗣音徽飾卻曼采  
華奕昌暉搏脯晉筭濱蘋湘綺婉聽尊章柔正君子容與  
圖史經緯檐帷詵螽振緝穆葛將綏筭象郁譽榆翟滋冲  
豐悴循遇喜愠韜容展如之媛洵汁酬德綰綰麗穉年壽  
上極伊何圓穹已撫已威璿華旋閔靈琯俄摧東邁雕輶  
北首泉里君姑矜惇純孝辭毀逝年莫援來芳允升貞石  
桑紀弗實閭陵

祭劉芙初編脩文

嗚呼疇昔交君同爲少年連鑣京國意氣雷顛九陌看等  
絛臺春豔題壁籠紗引孟說劍英英名譽袞袞公卿俊遊  
高會譚譙從橫語妙君房神清叔寶落落扞懷欽欽在抱  
荀卿遊學早著長安一編甫構萬口傳觀文史三冬成均  
賢舍賦賈金高詞源珠寫秋堂鐙暗春簾雨餘高軒在門  
時間讀書五十功名用償估畢射策平津科甲第一高岡  
威鳳翽羽天衢振采飛鳴凡鳥皆無玉署排籤蓬山僊從  
賦雪能寒眠雲有夢穠李無限開遍春風靈葩一樹偏悵  
能紅暖臂輓強大黃猶射李夢封侯才原中下嘔心精竭  
江筆非弩長饑臣朔賃廡東華有數稱奇無權造命平子  
工愁仲宣多病溯君地望江左謝王典型勳業載在旂常  
鄭氏小同清芬是繼述德無忘貽謀勿替君登上第通顯  
是期宜秉文衡拜獻彤墀詎謂沈淪一官十載寒畯疇依

名流競慨君之交友不尙矜嚴片語微長取善能兼朗月  
徵霄和風被隔管輅清譚三升醇酒平生絕學旁逮百家  
叔向數典多聞早誇君爲詩文滔滔清絕如裊餘香能紫  
曲折仙都廣樂手按雲璈急管絃幽咽檀槽旣與君才  
胡艱厥遇寔夢無靈排閭誰愬昔君南返致養陔蘭風雨  
歸舟握手盤桓信誓未終言猶在耳曾不逾時遽傳哀誄  
君更憂患嬰疾已深蠶枯作繭艸死抽心嫺特耆成同揮  
清淚家多哭寢士競爲位隨武之德言觀九原刳居朋舊  
曾其清尊執紼偕來生芻一束并舊陳情靈今來復尙饗  
祭黃恕堂先生文

倚維我公早覲荼毒重閹翹蔭緊長緊育晨飈泣樹夜誦  
芟蒿餘喘踰躡獨泗而眺毀室防鴉辭巢感誰十笏誰營  
三遷靡託其英寶體采采琅玕璿靈羅根珠池導源勛哉

儒修端乃初服韶輝滌瑕式金式珏有淵其質有鶯其文  
黃中通理藝林擷芬平子工愁相如善病盛志誰酬清塗  
孰竟塵棲白袷幕捲紅蓮未妨投筆早趁先鞭洞庭秋波  
粘天一碧迴湍墮星激浪立石千尺逆上北沅南湘驅景  
九面衡山之陽魚長欲飛蜺嘯似笑船指箭脫目不亭眺  
逝水冥冥歸雲陰陰浦思山哀鬱紆客心梁苑倦游江樓  
感賦彈鋏長歸飄蓬小住爰篤先業爰恢後規耑矩緝範  
丕基互垂庭誥推顏族師奉季威儼咸離子姓咸庇旁逮  
朋舊愛逾周親葛衫念故縞帶如新孰吉不耜孰凶不經  
孰饑不餽孰渴不啜蘇枯潤芡泐江灑河人集於蓼若已  
是瘞春館棠梨秋徑松菊娛清毓和永遐珍穀靈福保艾  
孔熾且長曾是景命竟不于常孔鴛鸞雛德門止止述志  
無憂克家有子鴻都討古虎觀談經東南竹箭貢之帝



廷陸謝雲閒荀來日下龍蹠待騫鯤鵬竟化

國朝常州駢體文錄卷第十五

國朝常州駢體文錄卷第十六目

芙蓉山館文上二十一首

金匱楊芳燦才叔

憶江南早春賦

老樹賦

擬庾子山小園賦

重脩懋平襄侯祠碑記

靈州移建太平寺碑

自敘

秋林集敘

伍康伯詩集敘

張蓉湖先生笙雅堂詩文集敘

張花農遺集敘

窈窕艸堂詩詞集敘

家斐園五兄遺集敘

郭祥伯魏塘移家集敘

送何蘭士爲寧夏守敘

書七人聯句詩記後

荅趙良甫書

荅岳一山書

與黃仲則書

荅劉松嵐書

與陳雲伯書

荅阮雲臺中丞啟

國朝常州駢體文錄卷第十六目

國朝常州駢體文錄卷第十六

芙蓉山館文上

金匱楊芳燦才叔

憶江南早春賦

宦遊十載隴頭人最憶江南物候新融融晴靄浮佳氣澹  
澹烟姿媚早春幾點遠山凝薄黛一番香雨浥輕塵莫愁  
湖畔冰初泮齊女臺邊艸未勻韶景舒舒風光倩倩過剪  
綵之佳辰罷傳柑之華譙梅點額而微飄鳥鳴心而始轉  
葉淺未藏蜻梁空猶待燕重欄日晷遲別岫雲容變漸芳  
意之相催知勝遊之可選爾乃名園閒寫俊侶爭邀輕衫  
乍試細馬初調任吹花而嚼蕊更摘葉以攀條路出烏衣  
之巷波通朱雀之橋才人紈扇佚女珠翹碾杯泛月蘭漿  
乘潮銷憂宜假日倚醉竟連宵詎肯續墜歡於後約尋晚

景於邊撩人共春以爭妍春似人兮未老憐呵鏡之微寒  
嬾卷簾於清曉苔髮青疏花房紅小對烟景之澄鮮愛物  
華之娟好琴彈鳳韶爐熏鵲腦託逸興於吟謠豁遙情於  
懷抱春色正無邊春華絕可憐尖纖春月初三夜嬌小春  
人二八年雲輕似夢水碧如烟閣看山而獨凭船聽雨以  
閒眠覺別來之未久問再見兮何緣況乎倦客羈孤邊城  
寥寂鷹風猶勁蛟冰未裂雪暗山遙沙平路直日曠曠以  
藏輝野荒荒而寡色能不含愁榆塞之笳寄恨玉關之笛  
羌笛相和金笳按歌感年華之晚晚傷容鬢之蹉跎彭澤  
之閒情不少蘭成之怨句偏多歌曰天涯春色未闌珊奇  
樹中庭已可攀浪迹久畱雞鹿塞離魂常到鳳皇山從道  
江南有人憶好教征客共春還

老樹賦

偶遊西直門外廢寺見老樹斷牆狀極奇詭朱野雲作圖  
余因賦之

悄焉獨遊慘兮古愁俯仰曠宇低徊廢邱上遺臺而眺遠  
聽竅木之鳴秋盤根互軋勁榦交樛問何年之老樹挾爽  
籟以颺颺爾其冰霜今古風煙朝夕附贅懸疣流膏注液  
禿枿如髡駢枝似孽猛兇突角饑蛟露脊鬪黑稍之三尋  
拔元雲之百尺拘攣貳負之尸犖确崑尤之額足使匠石  
驚而歛手山精賦而褫魄況復鶴警苦月鷗餐瘦煙衝風  
氣奪朽壤根穿倒挂則兔絲欲斷寄生而禽華不妍介性  
偏宜地僻孤標詎受春憐若迺過勝境而流連供騷人之  
撫玩能全劫外之生終勝溝中之斷長淪落以自甘顧婆  
娑而何歎惟餘豪氣之未除遂繼怪魁而作贊

擬庾子山小園賦

蓋聞汀潛之魚不知浩蕩之鉅解枋榆之鷄寧羨翳蒼之  
繁林安巢則不過一枝環游則有同千里余故家新野僑  
居灞陵感羈泊之多艱思林泉之暫適幼輿耽隱寄興邱  
壑之中叔堅嗜書放意輿蓋之外招枕石之畸士慕考槃  
之碩人雖囂塵而可容甘泥水以自蔽冬菰春韭差免飢  
虛曉筆算詩足娛疲朽優哉游哉聊以卒歲者也爾乃杜  
曲淹留茂陵棲止苟投足而咸安信余情之所擬激流植  
援誅茅藉芷灌莽密而鳥喧奔潦盈而鷗喜煙霞繚繞松  
篁邈迤就曲岸以流觴對平厓而隱几迺闢榛蹊遂開蔬  
圃谷暗留雲林香過雨花共色而異株鳥同聲而別樹池  
淺鷺漁梁空燕乳縛香茆而作亭架文杏而爲宇倦移向  
榻之牀閒捉張譏之塵願畢景于岩阿何縈心于鍾庾嘯  
傲林霞徜徉圖史恥爲夜客自稱冰子類相如之任誕異

敬通之見抵非頌酒而閉閣迺養病而卻軌逢輔嗣而談  
元對漆園而言理識野老之忘機悟達人之知止埋盆作  
沼壘土成山幽能皎潔近可循環緣坡莎滑坐石苔斑長  
卿綠暗簡子紅殷窺牖而遙峯競入投林而倦鳥爭還遁  
豈鑿坏暝還倚槁溪外負薪田中荷蓀瓜廬星晚蓬門露  
曉槐短黃疏松新翠小采杞葉以前羹醺蘭漿而溜醪魚  
生范史之庖蛙躍孔珪之沼投老邱樊身閒灌園籬東藝  
菊堂北栽護散穀皮之書帙對壺盧之酒尊竹低妨帽柳  
暗藏門領弦歌之靜趣無車馬之塵喧適興而天機自溢  
養拙而吾道斯尊坎止流行安于所遇不材同于社櫟無  
用儕于康瓠悵髮容之難待慨景光之不駐掌庾之世德  
猶存射策之年華非故地幸借夫鷦栖情莫嗟夫萍寓隙  
地數弓荒園十步雨後鉏瓜霜前收芋聊擬仲長樂志之



篇長吟平子歸田之賦

重脩漢平襄侯祠碑記

伏羌縣城西隅舊有漢平襄姜侯祠歲久傾圯乾隆癸卯  
春余宰斯邑改而葺之縣人咸請立碑余削簡而稱曰溯  
夫郭塢之大星已隕蜀都之王氣將終以羈旅之孤臣受  
軍國之重寄卒能奮忠勤杖膽義指柱偏安之局恢張薄  
伐之勛洎乎孱主迎降全師解甲猶思運曲逆六奇之策  
收卞莊一舉之功壯謀未成苦心莫亮揆其本末有得言  
焉按蜀志侯諱維字伯約天水冀城人紹忠節之家風負  
倣儻之才略傾身養士結髮從軍仕魏官中郎參本郡軍  
事值蜀兵壓境太守寒盟信乃見疑窮而歸命武鄉侯見  
而異之敎以虎步千人日以涼州上士馬援明智之識臣  
亦擇君豫讓俠烈之風士爲知己建興十二年武鄉侯卒

進大將軍錄尙書事封平襄侯遂乃繼祁山六出之舉興  
石營九伐之師拔臨洮三縣之民糾漢樂二城之眾部落  
面向羌戎響臻自隴以西可斷而有也無如讒臣構釁間  
豎擅權徹渭上之兵作沓中之避宮鄰內逼勅敵外侵徒  
恃劒門之險竟失成都之守陰平間道乏銀衡鎮杜之防  
絲竹孤軍有猿鶴沙蟲之慘君甘銜璧士盡輿尸棄三分  
之業廟社成墟奉尺一之書英雄束手遂使三軍斫石氣  
湧如山五將投戈涕流被面吁何悲也夫范蠡策越保甲  
楮於會稽田單復齊馳鍊籠於卽墨莫不奮折翼於已墜  
噓死灰而復然名著區中功成理外蜀雖顛踣外有聲援  
霍紹先之勁卒尙鎮夜郎羅令則之重兵猶屯白帝向使  
前驅五萬仍用蜀人白楮數千盡坑魏將艾先自斃會亦  
我禽金刀之祚中興火井之光復熾未可知也而乃空畱

密表竟發陰機冤遭紀信之焚莫効勃蘇之哭嗟天道之  
難問詎人謀之不臧是則裴世期之記注倘屬知言孫安  
國之陽秋徒爲日論矣縣爲古冀城地侯之故土也黃神  
紫嶽昔年曾誕英靈雲馬輟車此日應歸魂魄某式瞻遺  
範來謁崇祠霜露年深丹青歲古報功之典攸缺守土之  
責奚辭爰翦茅茨聿脩棟宇抒下士之丹忱焚椒築鬻紀  
前賢之偉績勒石磨崖庶幾風雲鬱起遙連蜀相之祠松  
檟森行永護樂公之社云爾

靈州移建太平寺碑

原夫禮鎧王於石室須陟名山謁梵帝於香城先尋福地  
丹崖翠嶽識檀特之高峯碧嶂巖窈仰耆閭之峻嶽千巖  
跨險百棋憑虛發雲構於自然極神功之不測是以簡栖  
頭陀之頌蘭成麥積之銘佐公天光之碑子昇寒陵之石

莫不寫林霞之奇秀狀岩壑之幽深遂使鵝殿增輝龍宮  
長價勒翠珉而不敝標白氈以長新若乃寶地迫於囂塵  
靈境局於平壤築昆侖之士不過三成開般若之堂無逾  
十笏縱爲極筆徒事華辭何足以照燭人天發揮龍象然  
而法惟平等寧陋夫偏隅教推廣大不遺於荒徼憑五乘  
以導迷途宏六度而濟塵劫在有心者能無述焉惟靈武  
之故城卽河奇之舊苑沙瀾匝地東接楊榆之關河流帶  
天西連雞鹿之塞爰有梵刹近峙亭皋雖岡巒之隱嶙之  
奇而川原有奧衍之勢徒觀其靈宮四柱祇樹雙林星毫  
月面供寶相之莊嚴珠網銀繩護蓮臺之香妙百枝鐙影  
光搖怯夜之旛九乳鐘音響答占風之鐸崇軒間出層構  
相承已足壯紫塞之觀瞻作青郊之屏障矣矧夫闡微妙  
之法藏具調御之神通流傳沙界誦光音之經震動風輪

建塗毒之鼓雪山吹藥慧伏眾魔苦海浮航慈濟羣品俾  
壑慄之士俗共結勝因率剽悍之人風爭趨善果詎非象  
敬之宏誘法王之神化歟方今遐邇乂安中外禔福種人  
內嚮裔土永寧七政均明躋蒼生於曼壽三階齊色慶豐  
年之樂康見瑞星雲降甘露雨此太平寺之所由名也是  
則嘉禾合穎詎讓苾芻之芬密樹垂陰卽是菩提之彩元  
鬬黃髮俱遊釋梵天宮野菽溪毛如饜祇洹法供又何必  
訪戴民之國登化人之臺求鷺窟之淨居企鹿野之華苑  
也哉惟是舊基卑陁流潦浸淫高欄岌以將傾繚垣隳而  
不直苔侵玉座雨壞寶衣奔流深黑非關劫燒之餘驚沙  
坐飛似集微塵之眾余職司守土愬然於心爰出奉金以  
倡善信更命僧心福募之四境以廣檀施鳩工庀材凝土  
度木去故址三百餘步築平臺二十餘丈雕甍映日鵬翼

將騫翠瓦排雲魚鱗欲動寶龕忽徙疑忉利之飛來紺宇  
潛移肖化城之涌出是役也檀行鳬趨役徒麈至闢三空  
之勝境啟七華之妙覺分菴羅之淨土樹堅固之貞林諸  
天則藉以閑安法侶亦此焉遊集某未通釋典摘寫葉之  
元詞夙慕禪宗喻貫華之微旨非云宣揚正覺於以歌詠  
太平銘曰

靈郊淨域朔塞香林松關左闢菌閣斜臨近帶華薄旁連  
碧潯圓鏡四照洪鐘一音持戒定慧閱去來今丹青歲古  
霜露年深隄衝蟻穴潦集牛涔銀楹侈剝珠字銷沈金容  
兩立瑞象塵侵萬善咸起眾力克任康時胥樂至教同欽  
手兩七寶掌出雙金層臺駸駸麗塢寄峯影藏柿鵲樂應  
靈禽花雨灑落松風嘯吟慧日夜朗慈雲晝陰定香氤氳  
靜梵惛惛早耽白業敢閱清襟憑廣長舌寫妙明心真如

不住了義難尋

自敘

昔劉孝標慕馮敬通有三同四異之論傳之藝林以爲故實余髫齡向學卽慕義山綜厥平生亦有同異竊比有志不能無述若夫流連簡牘窺尋行墨諷其綺豔之詩愛其瑰邁之筆未免搏摭貽譏拙摹致誚詩宗子美別粉無題文學彭陽遂擅今體有心晞驥肖形刻鵠天稟雖近亦由人力神合貌似俱無足言義山早困孤貧夙標民譽才論聖論受知于華州甲集乙集編次于桂管靡不傾襟方聞類首博奧余束髮投贄見知鉅公中年論交不乏勝侶盼睽增其光價招延長其聲譽過仲郢之好賢方崔戎之愛士此一同也義山壯歲掇科一命作尉宏農活獄致忤孫簡不遇武功幾遭斥放余早乘邊障迭經盤錯重圍鼓鑼

危堞烽火虎尾甘蹈鯨牙幸脫而遭白眼之睨被赤舌之  
謗仕途淪躓十年不調此二同也義山晚得一官檢校水  
部浮沈幕僚未挂朝籍余少無吏幹老愛郎潛職兼金倉  
籍檢黃白執戟自喜索米長飢趨曹有年注籍無日此三  
同也義山性似夷姤中實耿介南國妖姬叢臺妙伎雖有  
涉于篇什實不接于風流自敘所云諒非矯飾余亦摘屋  
稱貞閑房受記不入季女之室不登嬖童之牀雙髻吹笙  
十眉環坐雖耽綺語終等妄花此四同也義山策名上第  
校書中禁枕芸香于天祿詠霓裳于大羅鵬翼曾搏鳳巢  
未婦余則明經入仕青袍自公牘帖徒勞徹幕見待媿爲  
塵吏仍作山郎禮于佛之名經羨眾仙之同日此一異也  
義山晚辭幕府投老玉溪打鐘埽地皈心白業林霞契其  
清袞苔竹供其麗矚余則家徒四壁田無一壥子公丐貸



馬一  
那卿留賃關河棲屑蓬萍飄泊俗塵眯目奇愁塞胸誰贈  
棲山之資竟乏置錐之地此二異也義山文字傳後聲華  
照世名列文苑書傳延閣段溫遜其藻麗錢劉拾其膏馥  
余則聞見不博文采無奇忍鼠壤名銷蟬編字滅灰寒空  
井簡覆敗甌此三異也爰撰茲敘誌厥景行世有知己或  
不以爲妄云

秋林集敘

昔昇之抱疾握牘而賦五悲惠開無年撫鏡而發三歎遂  
乃聽白楊之蕭瑟傷病梨之凋悴寄思無端鬱伊不釋嚴  
霜欲霏驚碧樹之蚤落商飈乍起恐脩夜之不暘秋林名  
集意旨遙深已昆謀五丈少負異才夙抱奇志有文園令  
之節概慕蘭相如之爲人高門鼎貴而有并介之風甲族  
膏腴而無綺靡之習篤嗜圖籍殫精細素李謚著神士之

賦玉符撰潛夫之論一詠一吟乃其餘事而時出雋語老  
宿咸推服焉今集中所存天藻豔發雅聲遠姚竹柏之契  
證於靈襟泉石之華交於麗矚含懷負遠事外之致殊多  
造語幽微區中之韻彌少信可謂神棲颺藹之表氣陵煙  
霞之上者焉惜乎長轡未騁逸步屢蹶如屈蠖之終蟄加  
瘳疴之不對玉三獻而遭刖博十擲而得韃非關操技之  
拙可知賦命之奇幽蘭易萎誰尋空谷之香神劍長埋永  
閼窮泉之彩昔王仲祖疾亟慨然曰若人竟不得四十乎  
齋志以終長懷無已以今方古有同悲矣然恆榦難恃而  
聲華不滅隱德未耀而已治克傳枚乘之後生皋夏侯之  
門有建宗風斯在世澤弗渝珠水依源槐根仰蔭此我萼  
樓三兄所以啟楹書抱竹冊胖胖兢兢思致先人於不朽  
者也某常讀舅氏雙溪先生遺文其稱五丈也有曠代逸

才之目每企慕風采以不及見爲恨茲受斯集而卒業焉  
都官晚出得讀表聖之詩玉溪後生竟敘次山之集不可  
謂非厚幸也已

伍康伯詩集敘

原夫眾卉吐馥而蘭茝之芳獨幽八音調風而琴磬之韻  
爲古逸鵠謝池鑾之玩潛虬媚淵壑之姿斯天質之本然  
爲詩品之最上清辭夙發雅聲遠姚遊心溟滓之表振衣  
埃壒之外動與神會匪由思至如康伯之詩其庶幾乎蓋  
其幼秉庭誥早傳家鉢鳳九光而耀彩磨一角以振奇士  
秀生陵肩吾有信人如武子叔是濬冲弟有惠連君爲康  
樂四始五際溯厥淵源三筆六詩自相師友宜乎冲照洞  
徹靈襟卷舒賞極煙霞悟參花水命儔嘯侶時爲林澤之  
遊坐席行衣間發尊罍之興醞釀百家成其馨逸澄汰眾

製煦以鮮華昔人所謂首尾裁淨風采適上者也夫音樂  
所以順耳而魏文愛椎鑿之聲芬香可以悅魂而唐宮厭  
都梁之氣歸昌之律莫采嫫娃之髭誰珍知音者稀眞賞  
殆絕喻鳬吟卷不見許于樊川崔顥詩篇乃遭訶于北海  
風花錯迂才命升沈客路關河塞天冰雪伴秋蟲而自語  
孽春翹而有思能無增嘆喑于窮途寄鬱伊于枯管乎昔  
雍門揮弦而孟嘗掩泣感曼聲也桓伊撫箏而安石隕涕  
悲促節也僕本恨人同爲羈客孔臧援筆自賦蓼蟲劉峻  
難薪共嘲書蝨江湖白社誰貽招隱之篇鐙火青山時作  
懷鄉之夢擇枝之鳥相隨並集下瀨之水迴復俱流同病  
相憐固其宜矣茲復送君灞水遠赴夷門太華孤雲渭城  
零雨對離觴而不御聽別曲以沾襟異日者過繁吹之遺  
臺尋鶴鳬之舊苑古歡可索佳俠所游山水輔其奇懷風

雲歸其壯思擺落詩械解脫天殛他年信其可傳前路寧  
無知己將見鑄金而事賈島浣筆而圖孟公亦仍以康伯  
之詩卜之而已

張蓉湖先生笙雅堂詩文集敘

昔鄭夾漈有云義理之學好攻擊詞章之學尙雕鏤習義  
理者以詩賦爲曼辭工詞章者以箋疏爲樸學卒之朝霞  
落采空谷尋聲根柢不存二者交病若夫才全能鉅體大  
思精宮眾嶺而爲山彙萬流而成瀆經神學府撮服鄭之  
標辯圓詞宗吐卿雲之思春華秋實美可兼收文苑儒林  
理原一貫成德不器大方無隅吾于蓉湖先生見其人矣  
先生體英絢之姿爲賅博之學兼九能之備自有德音通  
六藝之全闡其奧旨早受禮堂之簡晚讀中祕之書鉤稽  
緝繩薈萃墳典甲乙觀裏執四部以精搜庚子日中列五

經而下拜其於易象尤極淵微平八索以成人吞三爻而  
協夢得馬陸之象數舉荀王之正宗施孟異聞周韓殊旨  
自以心極定其指歸知三聖之心折諸家之說繇絡輿蓋  
懷囊古今其餘羣經準於一例仲師作周官之傳安國細  
孔壁之書承天緝羽陵之祕文廣微證安釐之墜簡莫不  
啟其鎔轄綜厥喉衿其自敘云經傳之出至兩漢而已全  
注疏之學至正義而略備二千餘年不能增易嗣後異學  
爭鳴遞相祖襲竄易經典穿鑿新奇信口說于末師束傳  
記于高閣徒誇摭摭之富不事研窮之精慨經訓之支離  
懼聖道之湮晦先生之意深矣先生之學粹矣故其爲文  
醞釀書味含咀道腴述潭奧之微言排溝渫之贅論三摹  
九据不事元亨之奇七緯六駁自得緇壇之祕淹中學士  
箸錄成帷棘下儒生流談若海洵可謂雅文之君子博大

之眞人也。已至其爲詩，則逸響獨結，雅聲遠姚。日光玉潔，海懷霞想。手爲大冶，千鍊發其精芒。胸有靈機，錦繡陳其綺麗。詞源所倒，似瀉崑崙之渠。墨瀋之餘，猶成睢渙之水。自敘云：舊作數千篇，刪薙大半存者，僅千餘篇。簡元珠于寸璣，擇神劍于一鐔。含經辨迭，變醢養醇。冰襟不寒，菊韻彌淡。成連之琴，再鼓化人之酒。欲清統大魁而爲笙，包五際而奏雅古樂。振咸韶之響，鴻儒傳金玉之音。祇出學海之緒餘，已樹詞壇之極則。彼甲非乙，是分道僭馳入主出奴。反脣交詆者，讀先生之集，當適適然驚規，規然自失矣。詰嗣霽岩奉抱遺集，將付梓人，屬以編摩，竝爲敘引。自惟末學，皮傅謏聞耳。剽漢代經法，僅涉其藩；宋儒理譚，未博其趣。挾笞鮮獲，削牘徒勞。敢以黠淺之辭，妄作高深之測。惟是企丈人之穆行，慕前詰之遐規，未能結轡撰杖，奉手

書策之旁猶得齋素濡毫綴名緹緗之末憫墨而謝竊自幸焉

張花農遺集敘

匹士不遇幅巾窮巷仲蔚臥病蓬蒿塞門少陵窮愁苦蘇及榻衰鐘秋室短褐長夜宿艸將刈緒言莫傳而能使詩人裴回弔張祐之舊宅故交鄭重求孟六之遺文此其精神必有不可敝者今之少年喜訪前輩文舉雖爲千古篤論孝章要有九牧大名若夫負宙合之望而重里黨之彥抱雄異之才而愛孤冷之作詩編笠澤書荅秣陵發潛德之幽光慰長逝之私恨平生生死友是謂信心花農先生雲間俊人江左畸士稚圭通經早傳令譽子雲作賦少無俗聲尤工詩歌癖嗜吟詠經緯文質激揚騷雅撫景光而叩寂抗音響以結風氣出與精列相和濫觴共簞鐘迭奏棗



膚抉髓斂志詣微窮興寄之殊軌極律切之能事兼以高才淪蹟壯志忼慨鬱伊不舒幽憤間作子昂感遇轍古而振頽風彥伯詠史吐音而非凡唱嘗自定牀山堂詩集穀人祭酒敘而行之世咸知其工矣嗟乎詩能窮人才偏妨命箸筮塗以抵疑釋元居而寄傲鵬鷺集舍鷺識巢門僚幽告終懷和委化徂年促迫已傷朝露遺編零落將同秋艸姚子春木以張堪把臂之託軫向秀思舊之悲緝溫岐漢上之詩歸元結篋中之集搜其散佚正其訛誤合前爲若干卷付之剞劂董遇朱墨不患其無傳方千篇什可期於不朽較之割宅遺孤縣劍空隴者消至之行何多讓焉余重先生之詩品感春木之交誼濡毫削牘敬爲敘引不猗不訾貞曜廼昌其詩一死一生巨卿無負於友俾後之觀者有所興起云

窈窕艸堂詩詞集敘

戊辰仲夏余與簣山大兄聯榻于西湖之詒經精舍林雨乍歇蘋風微涼翫海上之蜻狎湖干之鷺新水拍岸舟行碧虛浮嵐塞門衣染黛色清遊既倦介居多暇搜舊橐干故篋追往事于前塵屬以編摩命爲敘引離合之蹟有可述焉當夫隴首停驂秦川奉袂言尋昌谷共訪仇池荒艸斜陽隗孟尙畱軍壘顏垣老樹杜陵曾賦羌村攄懷古之思多寄愁之作至于星闌燭施葉早花新醉墨題柯古之襟俊侶把浮邱之袖伯歌季舞酒座琴言此則引聲發唱宮羽相和因物騁辭情靈無壅者也泊乎花門構孽艸竊挺災鵲騎晨馳狼烽夜警助余張目與子同仇卻攻之帶一圍禽敵之符九寸雄心憤薄壯氣飛揚和僧超斫陳之歌應越石登陴之嘯落紙而風雲鬱起擲地而金石爭鳴

推塞上之豪吟爲集中之變格矣斯時也兄方茂齒弟亦  
華年辯折神錐手馳天馬管輅枝葉之論能服子春劉陶  
縱橫之辭常屈輔嗣自謂筆揮虹電氣逸煙霄何期人事  
蹉跎行蹤錯遑十舉不第君似溫岐一官不調余如羅友  
況復同抱鵲鴿之戚更銜莪蓼之悲孤桐之枝其根半死  
卷施之艸其心永傷腸縷縷而九迴髮班班其二色天涯  
流浪旅舍棲遲誰爲餓隣而落毛徒效窮魚之呴沫而迺  
搜羅良蠹掇拾叢殘鏤心于魚網蟲書畱意于玉篴金鑽  
恐遭覆瓿豈望籠紗無乃耽結習于三生墮名心于九部  
乎然而木槿早落不如薰艸晚華也班嗣夙悟不如袁遺  
耄學也東堂射策雖負龍須之友西清薦士或下鶴頭之  
書幸寶卞珍無愛倅指沈冥而研典籍韜養以待徵招擴  
炳燭之明惜落棠之景願與兄共勸之而已

家斐園五兄遺集敘

斐園五兄抱英時之才爲沈研之學博綜流略兼工詩歌  
和墨澹情灑翰攄采一篇甫就眾口爭傳少與西河三兄  
齊名伯歌季舞同鬯宗風三筆六詩咸承家學芳柯蘭沚  
益壽既有清吟曲曲汜迴潮惠連尤多雋句信如盈川所云  
瓊敷玉藻未足多也余纔弱冠之年卽廁諸昆之列時過  
履道之舊宅訪崇讓之故居巷指青楊齋尋丹柰所謂九  
柏山房者余昆季釣游地也密葉翳日窗光團青修榦聳  
霄壁色純黛洵足方元亮之五柳傲少陵之四松相與激  
流植援莊圖枕史解巾待月踞向栩之牀把卷追涼移魏  
收之榻陶陶焉逸逸焉不自知其樂也無如年華迅驅人  
事逋駭俱營薄祿各辭故邱翩若驚禽墜如秋蒂分手背  
面寒暑十更旣而弟從宦於伊涼兄移官於關隴游鱗飛

羽頻傳連錦之書白艸黃榆壘和邊笳之曲塗路雖局官  
 守有限聚首之期亦未能數數焉戊辰歲兄爲華州別駕  
 余應方葆巖先生之招主關中講席奉檣破涕銜盃敘懷  
 指少華爲故山說童年之舊事詩西河三兄已卒於西粵  
 余弟荔裳亦歿於蜀中各傷雁序之凋殘共抱鴿原之慘  
 戚時有唱酬之作輒多悽戾之音兼之薄宦無悰徂年善  
 感思鬱鬱而不樂日昭昭乎易馳至己巳之秋而兄亦下  
 世矣青簡尙存黃壚遽隔無今追昔弔夢歌離未竟百年  
 慚覺素交苓落又弱一个能無老淚萑蘭遁於鉛槧之餘  
 力任詮排之責宵長漏急月黯燈昏愴遺墨以如新悲  
 翁而不見自愧謝家末婢文采無奇惟望阮氏阿咸聲華  
 不墜茲編成詩集四卷補遺一卷付姪岳生藏之家塾以  
 待梓行

郭祥伯魏塘移家集敘

山紅礪碧可致幽人樂危桂榮宜招隱士耽泉石之素翫  
極煙霞之麗矚鑿岩架屋依林結宇將以抗希若士睥睨  
仙夫而徂年易流山資未辦望岫息心弗可及已至若疲  
精田舍恣意聲色庚辛之房甲乙之室銅沓金塗綠墀青  
瑣重樓跨雨高閣連雲匪我思存亦君所諱所望五畝之  
宅半郊之居桃李須陰藜蒿不翦闢蹊蹊之徑學蜘蛛之  
隱卷帙可娛鑲采自給放懷魚鳥息影松阿是區區者猶  
不余畀迺使風塵羈泊江湖流淚斂眉寄食俛首求衣居  
賓石之壁間僦伯通之廡下俯仰身世能無慨然郭子祥  
伯族本松陵住近楓浦土鄉難託經舍就荒飄零琴書提  
挈老幼浮家武水卜居魏塘嘉賓助買山之資季雅署賣  
宅之券荒齋十笏小園百弓鑿壁而貯酒鎗就石而支筵

銚畦韭乍翦時來故人林花初開聞招近局略多白醉偶  
爲元言賦劉杏之林庭贊江淹之艸樹此移家一集所由  
作也憶余少歲曾遊此邦水土清佳人風流美坐三經之  
席招八能之儔蘿窗棲煙竹閣臨水孤月白夜惟聞櫓聲  
微雲澹秋獨與琴語一彈指頃三十餘年前塵波馳影事  
電謝而蓬萍流轉杞菊疏蕪稅駕何鄉卓錫無地他日者  
成獨往之志結自得之遊當與祥伯連境而居薦瓠共酌  
丹崖素瀨賡蕭遠之九吟蚪篆琅書授敬游之十賚息壤  
在彼何日忘之

送何蘭士爲寧夏守敘

要服五百里爲畿望之屏障良吏三千石宣廊廟之風猷  
珪符是膺鎖鑰攸寄歲在端蒙日躔奎陸

天子念邊郡之需賢綜羣才而取儔于是蘭士先生有寧

夏守之命士流稱慶民萌相賀英雄劇之得人知守屏之  
稱事焉先生以通博之才爲經濟之學夙馳令譽早登甲  
科由水部之望郎晉鐵冠之清秩蘇綽文案立之程式馬  
周臺省悉其典章甫巡東國之漕卽有西江之拜蒞宋均  
之舊治揚衛颯之清風報績未及三年治行已推第一望  
雲念切移病乞歸讀禮旣終復有此授寧夏提三城之險  
塞當九邊之要衝漢設屯戍樓煩肆其侵陵唐置壅門土  
蕃縱其鈔盜岩疆難治依古類然我朝則中外一家部落  
咸附亭障列衛桴鼓不驚牛馬內嚮垌牧羣戢先生示以  
恩信布之廉惠有馬如羊不以入廄有金如粟不以入懷  
使裔土永寧皇人受穀此鄧訓之感罕羌田豫之撫鮮卑  
也寧夏地濱大河物產豐博土沃饒而近鹽水肥仁而宜  
稻河渠之制肇於漢唐我朝增置二渠灌漑萬畝蒼龍旣



見則荷鍤如雲朱鳥方殷則決溜爲雨川瀆于焉順導薪  
樵宜乎預儲焉流之方防先嫩堰均水之法施及瘠區惟  
歲功之是興爲經務之最急先生熟班氏溝洫之志兼汜  
勝農田之書將使曷鹵無荒磽确胥墾手實之施七尺膏  
壤之入萬鍾此又史起之引清漳鄭國之疏瓠口也寧夏  
士習禮儀俗尙節概傳昭蔚爲學府梁祐暢其儒風方今  
文教覃敷英才輩出橫經之彥日詣檀橋著錄之生霧集  
槐市先生下車觀風釋菜入學舉咫尺聞之訓敎待叩之教  
傳微詩細摘鉛槧之千言規箴矩模勵庠序之四行獎珥  
生于馬隊之肆成季寶于牛衣之砌行見裁章儲壁養其  
瓌奇廩徒畫羽繡擊加之斧藻此又任延之治河西文翁  
之化蜀郡也至若朱墨填委而剖析如流文案周環而嘯  
歌不廢敷塞晏之化行端平之政物在宥而咸理民緣督

而自勸固先生之所素裕也余何贅焉某曾任靈州寧夏之屬邑也十年不調自恥蟻趨三異無稱人笑方格屢書下考甘爲冗散之材倘執公儀合在沙汰之列茲來京國遂託心交琴歌酒賦頻奉緒言蕙鬱蘭薰忝同臭味送君遠道感我舊遊高柳可折遙指楊榆之關驪駒欲行遄經雞鹿之塞辱承下問竊附贈言敢云乘車之先聊當負簞之導云爾

書七人聯句詩記後

右七人聯句詩記明儀部主事君謙先生之所箸也先生雅負高氣不耐俗氛攜幼輿蕭淡之懷抱子雲顛胸之病陳牒得請買舟欲歸時黃岩老人與趙栗夫諸君以賢達之素交惜江湖之遠別攜尊話舊促坐論文勝流畢集同竹林之雅游今雨不來異杜陵之秋述簪紱盈座閒以芟

荷之衣桂椒其岑參之竹柏之韻情殷索偶交本忘年寧  
知仕隱途分惟識風騷旨合遠迹崇情弗可及已當斯時  
也天欲莫而秋生客入門而雨作庭綠如洗林芳轉清抽  
蕉葉之箋酌蓮花之醞枯桐流潤對虛牖以眠琴古石蒸  
雲就方池而滌研速藻豔發雕談揆張情往興來推襟送  
抱聯句則奇追韓孟倡和則雅匹王裴簷溜不歇而吟情  
愈豪街鼓將沈而酒趣彌永可謂盡頽唐之態極酣嬉之  
樂焉夫哀絲豪竹之娛饌玉炊金之宴珠履接席紅裙踏  
筵非不羅水陸之珍奇闔聲色之姚冶然而歡場易散寧  
殊聚蟲華光不留忽若秉電誰復尋遺蹤於仿佛撫軼事  
而流連浩劫浮塵古今同慨若茲之激揚羣雅照發冲襟  
詩諧鐘石之音人有仙靈之氣逸韻宛在高風可思非所  
謂靈山一會儼然未散者耶

荅趙良甫書

良甫足下前奉贈言敬析名作發函伸紙歡喜無量風藻  
豔發天才揆張五音繁會簡子魂驚九光徘徊安豐日陶  
范史事外殊有遠致庾郎胸中故無宿物出入懷袖恍如  
覩面紙微墨渝諷覽無輟情文兼摯辱郎君之謙下掄揚  
過當恐君子之失辭中心欽欽以感以愧僕少好辭章頗  
自鏤礪殫精圖史頤情典墳託豪素以抒懷撫領缶而發  
唱庸音自効結習所存如鼃鼃之甘烟若蠅蚋之赴溼或  
歌或嘯一詠一吟希掉鞅於文壇庶繼組於作者無如人  
事煎熬家累驅迫竊升斗之祿爲風波之民邊障十年羈  
宦萬里堙腐性靈疲頓竿牘偶有撰述輒自慙而深藏篋  
笥不欲示人志業蹉跎光陰遷貿茲復倦爲塵吏甘作山  
郎筋力肉緩不利走趨心頑質堅偏好冥默屬文多翫戲

之習當官有蕭机之稱推排已久覺老物之可憎拚抑自  
傷知盛年之不再王微之宦情本淡江革之僻疾難瘳時  
恐急景凋顏牢愁驅壽思欲返芰荷之初製踐猿鶴之舊  
盟而塵累尙牽山裝未辦眷言疇昔彌用疚懷兼之京華  
知舊意緒寥落天涯倫好蹤跡睽闊握管無侶舉觴莫屬  
春寒陰陰獨坐閒館輕塵盈几飛鳥窺戶管寧榻破向棚  
牀空我懷云勢不可說也足下馳俊譽於早歲揚采烈於  
名區青萍結綠望氣者知貴濫觴號鐘知音者競賞舍香  
漸越蜚聲日遠方當雍容臺省翔步雲霞道直途清相見  
或易藉得挹注宏抱雪滌素懷跂予望之心乎愛矣川途  
間隔久遲作報茲乘風便聊布夙心

與黃仲則書

某白自別光儀甚相思想不見叔度鄙吝日增古人云然

殆不謬也前在蘭陵與諸君寒窗翦燭商略文藝弟時負  
重憂戚然不怡及恩恩返棹孤坐蓬廬藜蒿塞門徑無行  
者追憶曩時聚首又邈若夢中不禁淚之淫淫承睫也昨  
以不棄示之緒言雜誦再三心折久矣雲蒸龍變蚪翔鸞  
躍希世寶也希世之寶常爲世祕之惜之夫貧窶之子藏  
燕石者什襲享敝帚者千金此矜惜之過也若陶朱倚頓  
之家撻夜光碎結緣則暴殄之過爲尤甚竊見足下有所  
撰作略無畱手而倦於哀錄弟私以爲過矣又嘗論人之  
聰明才力當用其所長掩其所短與其博而不精毋寧嚴  
而不濫譬如首路者裹餽糧整車騎雖崑崙流沙之遠循  
途刻日可至也若朝思登崑崙夕欲泛洞庭吾恐願奢志  
紛終至白首鄉閭耳古人遺集奚翅百數談六藝說五經  
陳言累累盈細溢縹後人視之惛然欲睡以塞鼠穴供蠹

糧矣向亦鏤心刻骨求其可傳乃今如是悲夫詞賦小道  
然非殫畢生之力不能工也而好高者往往失之子建旣  
小辯破言子雲復老不曉事強思畫虎故薄雕蟲願足下  
勿爲所誤幸甚弟窮愁轉軻萬緣都廢惟文史結習未能  
去懷日來窺班范之鉅製彷彿庾之瑋詞銖積寸累自謂  
有得然眞賞殆絕知音者稀張率之詩云沈約則句句嗟  
稱慶虬之賦託相如則篇篇傳寫庸流之人貴耳賤目依  
古有然何足怪也想攝衛惟宜眠食增勝茲因風便敢獻  
狂言

荅劉崧嵐書

崧嵐年大兄閣下仲秋望日接奉良書發函伸紙喜與忭  
會知閣下言辭京輦過歸梓里游梁入洛復回運城萬卷  
羅胸雙珠在掌人生至樂誠無以逾下風企羨非可言喻

並稔閣下興逸區中趣寄塵外躡康樂之屐佩紫微之壺  
欲搴玉井之華蹠巨靈之掌氣豪拂霓詩奇問天名呼林  
央志擬禽向因命不佞其探幽奇自惟青鞵布鞵本有前  
期翠巘丹崖屢入昔夢西風涼冷尋問真源極欲追隨以  
償夙願無如精力衰羸腰腳疲茶本乏濟勝之具又抱幽  
憂之疾覽鏡顧影則蒲柳呈姿臨壑忽遙則煙霞絕想足  
躡蟻封之埵力殫魁父之邱散步行藥猶覺呀喘而況太  
華千仞拔地倚天高峯尋雲深谷無景未能懸崖撒手固  
當望岫息心通天敏門欲觀枯柏之箭布地求福愧乏棗  
梨之錢旣負嘉招又乖素尚臨風軫慨愴恨何言所望閣  
下清遊旣愜高軒早臨翦燭西窗藉傾積慳會言近止何  
快如之

荅岳下山書



春明益宗訓醉歡洽山川隔閼星歲遷賀光景莫接波濤  
寸心駐車關輔談藝橫序坐戴憑之遺席擁馬融之舊帳  
屏營無已馳叩倍增遠辱損書曲蒙存注子元論議縣河  
注瀉令明辭義澄波淵映披牋雖誦不勝熱服敬維閣下  
早辭清要夙標高尚白華致養詩咏壽康冰鑑衡文士欽  
精藻總擘英偉按緝文獻高風遠洽化雨溢流馭譽日隆  
多文爲富植耳迅聽欽挹良深關內神皋人文蔚起惜某  
往歲奉檄遠在邊鄙今來主講又拙結納暖姝藏拙孤陋  
抱愧一時賢達罕通紵綯幸得指示昭若發蒙藉茲品題  
可希津逮物色異人從茲始矣每怪秦中自王李山史豹  
人諸先生後詩文傳播音響沈聞旣而思之蓋非人材寥  
落步武乏絕良由表章無人是以湮滅不顯卽今屈指已  
得數人或紹詞賦於淵雲或辨聲形於倉雅強君星學則

甘石之經也介侯黔書則裴闕之志也竝世如此前此堪  
知昔元文五千尙虞覆瓿紫宙三萬幾無剩牘謨觴古簡  
半歸蝨蝕宛委殘編悉聽鼠齧流傳之難古今同嘆伏維  
閣下望崇闢學蔚爲儒宗繼馮李之淵源奮王康之文筆  
土壤不讓羣士學山魁杓所指君子秉斗則網羅遺佚補  
綴殘缺攄懷舊之蓄念發潛德之幽光非異人任也久勞  
蒐訪定多創獲一經著錄卽播遐邇斲石而兔璞呈輝探  
波而遺珠迴照宣揚風雅嘉惠後學甚盛事焉某雖衰鈍  
樂觀其成尙望畱意以副厚願講院生徒向荷教澤卽今  
馳企悉感化裁守丁恭之講義遵劉昆之典儀文學皆欲  
就匡衡朱墨則猶傳董遇糜醢所漸風流未沫皋比繼擁  
教授空勤無袁遺之篤學詎可爲師異崔儵之讀書聽其  
入室元惟尙白青易出藍內手捫心良增慙慙何當時聆

屑琚敎以斲輪永戢箴規庶寡讐咎至承渥愛問及出處  
關念篤摯感佩靡涯某少無宦情誤繼塵鞅毛義作吏實  
資祿養顏駟爲郎卽同引退今者永抱風木之悲長茹脊  
令之痛久傷哀樂更乏趣向且日月逝邁精力衰耗等長  
卿之瘠渴同子雲之顛胸願茲疲茶豈期榮進稍謀山資  
卽返野服幸畢願於婚嫁庶樂志于邱園雖復公叔貞孤  
史雲單陋生計蕭澹經營拮据然道在日損性無所溺處  
茲窮約亦當有以自娛耳拙著詩文曾付剗劂並求是正  
以祛蒙霧自維少尙偏奇老謝精詣智慧日減撰述亦稀  
同許惇之隱几愧君孟之伏書炳爛已遲懷鉛徒奮所望  
加以繩削賜之甄錄俾附駟驥以長傳不共哀蟬而俱朽  
其爲感激寧有旣邪

與陳雲伯書

自違譚讌忽更歲籥山川超緬鱗羽淹滯每懷雅度怒若  
朝饑敬維閣下製錦宣猷鳴琴箸化侍奉多福循蘭在陔  
拊循有方拔薤當戶臺府賞譽閭閻歌頌俊譽雷頓清聲  
颺起下風傾聽喜與林會某遠越隴坻坐守經舍敝瓊折  
几蕭寥無侶戒香定水枯冷如僧涼風碭駭秋陰黝儵廣  
除十笏荒宮五畝寒卉宗生幽鳥族聒每當晦雨冥沐長  
廊隱翳壁苔紅綠色類殘畫砌蟲唧唧聲應古瑟對茲岑  
寂殊乏趣向慨焉寤嘆念我故人莫由咨覲彌增苑結加  
以倫好殊寡呼唱莫應帖括填委苦乏秀異丹黃點注彌  
損神智才思轉退撰述亦稀每念閣下快字陵紙俊語霏  
屑見示一篇輒諷百過譬猶神鄉奇帛經緯騰輝海國異  
香脰脾沁馥際離日久吟咏更富愛而不見搔首踟躕何  
當郵示慰其索莫至於旅遊寡味徒事羈泊僚黨渺歎更

無結納貧悴尤散有似孝標潦倒羸疏竟同叔夜徒暖姝  
而自好甘貞孤之不諧無如甄字篤學終累家室向平肆  
意未畢婚嫁生計蹙迫方寸堙鬱每翹首南望未嘗不自  
悔西笑也小兒夔生兩謁高齋備蒙款洽閣下念其窶貧  
加以周恤俾昌黎舉室暫止嘵號史雲窮居不須拮拾分  
金指困誼等古昔响溼濡沫通其有無高義如斯銘感尤  
極某射猶觀於兔首味無戀於豬肝興切尊鱸夢繞松桂  
會泛江頭之棹佇陪湖上之尊相見匪遠馳神轉切端函  
削牘敬候近祺書不盡言但問父繫

荅阮芸臺中丞啟

前歲輿衛在都感蒙過訪懷刺報謁未奉光塵景仰私忱  
欽欽在抱復荷示之鉅製惠以瑱書探苑委之藏發謨觴  
之祕經神學府則殷陸扶輪辯固詞宗則淵雲承蓋猥以

汎剽妄測湛深編摩積年神蕊形茹閣下文惟天授才爲  
世出藝林哲匠康時寶臣抱醇鬯之心敷塞晏之化鳩扈  
率職澤覃耕桑鯢鱸匿形波靜溟渤絳闕倚重蒼生仰流  
迺復愛士情殷搜才路廣含經味道之士懷鉛挾槧之生  
入學舍而橫經登禮堂而寫簡咳唾所及不數顧廚陶鞫  
之餘猶成曹陸稊縫鯁冠流談若海細腠綠牒箸錄如雲  
海內龍門舍公誰屬弟揆早邀英盼得託素交稟命不融  
中年遽隕閣下古道盛心綢繆備至朱季致賻卹張堪之  
孤子明緘書求李賀之集念其慧業工文癖性耽句弱齡  
羈宦壯歲從戎歷繩行沙度之鄉供炊矛盾之役境極  
險塞詩亦經奇茲衛藏紀事二卷同少作已付剞劂尙有  
苗疆蘭州詩並遺文共四卷俟梓成續寄幸藉品題俾傳  
不朽感何如之某材旣凡庸識更樛昧偶撫缶獨倡楊

馬一  
三  
琴胡叟才拙時有鄙言鮑昭思竭尤多累句補袍覆醬無  
可觀采茲承來命不敢自匿謹封如別仰酬褒誘貴門生  
陳君文述曠代逸才揚班儔也在都與某爲文字至契敬  
肅蕪函屬其轉達輕干清重曷任兢惶